

gana, prije stupanja na snagu ovog zakona, primjenjivat će se odredbe Zakona o porezu na promet nekretnina - Prečišćeni tekst („Službene novine Zeničko-dobojskog kantona“, broj: 13/08).

Član 37. (Prestanak važenja Zakona)

Danom početka primjene ovog zakona prestaje da važi Zakon o porezu na promet nekretnina - Prečišćeni tekst („Službene novine Zeničko-dobojskog kantona“, broj:13/08).

Član 38. (Stupanje na snagu Zakona)

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-8661/09

PREDSJEDAVALAČI

Datum, 01.04.2009. godine

Zenica

Sejad Zaimović, s.r.

78.

Na osnovu člana 37. stav 1. tačka f. Ustava Zeničko-dobojskog kantona, člana 1. stav 2. i članova 196. i 219. Zakona o izvršenju krivičnih sankcija u Federaciji Bosne i Hercegovine („Službene novine Federacije BiH“, broj: 44/98 i 42/99) i člana 44. stav 7. Krivičnog zakona Federacije Bosne i Hercegovine („Službene novine Federacije Bosne i Hercegovine“ broj: 36/03, 37/03, 21/04, 69/04 i 18/05), Skupština Zeničko-dobojskog kantona, na 28. sjednici održanoj 31.03.2009. godine, donosi:

ZAKON O IZVRŠENJU SANKCIJA U ZENIČKO- DOBOJSKOM KANTONU

DIO PRVI - OSNOVNE ODREDBE

Član 1. (Sadržaj)

Ovim Zakonom uređuje se izvršenje novčane kazne, mjera sigurnosti i odgojnih mjera izrečenih učiniocu krivičnog djela, odgoda i prekid izvršenja odgojnih mjera, izvršenje prekršajnih sankcija, kao i druga pitanja od značaja za izvršenje sankcija u Zeničko-dobojskom kantonu (u daljnjem tekstu: Kanton).

Član 2.

(Način izvršenja sankcija i mjera)

Sankcije i mjere iz člana 1. ovog Zakona, izrečene učiniocu krivičnog djela (u daljnjem tekstu: osuđeno lice) i prekršaja (u daljnjem tekstu: kažnjeno lice) izvršavaju se na način uređen Zakonom o izvršenju krivičnih sankcija u Federaciji Bosne i Hercegovine i ovim zakonom ako posebnim zakonom nije drugačije propisano.

Član 3.

(Organi izvršenja sankcija i mjera)

- (1) Na teritoriji Kantona, sankcije i mjere iz člana 1. ovog Zakona, za osuđena lica i kažnjena lica, koja imaju prebivalište, boravište, odnosno sjedište na teritoriji Kantona (u daljnjem tekstu: prebivalište), izvršavaju slijedeći organi:
 - a) sud koji je donio prvostepenu odluku kojom je sankcija izrečena (u daljnjem tekstu: prvostepeni sud),
 - b) centar za socijalni rad -služba socijalne zaštite općine u kojoj osuđeno maloljetno lice ima prebivalište (u daljnjem tekstu: centar za socijalni rad),
 - c) Ministarstvo unutrašnjih poslova Kantona - policijska uprava općine na teritoriji Kantona u kojoj osuđeno, odnosno kažnjeno lice ima prebivalište (u daljnjem tekstu: policijska uprava),
 - d) nadležni inspeksijski organ čije je sjedište na teritoriji Kantona (u daljnjem tekstu: inspeksijski organ).
- (2) Organi iz stava (1) ovog člana izvršavaju i sankcije i mjere koje su osuđenim, odnosno kažnjenim licima, koja imaju prebivalište na teritoriji Kantona, izrekli sudovi i drugi ovlašteni organi čije sjedište nije na teritoriji Kantona.
- (3) Sankcije i mjere koje su osuđenim, odnosno kažnjenim licima, koja nemaju prebivalište, odnosno sjedište na teritoriji Kantona, izrekli sudovi ili drugi organi čije je sjedište na teritoriji Kantona, izvršavaju ovlašteni organi određeni zakonom kantona u kojem osuđeno, odnosno kažnjeno lice ima prebivalište.

Član 4.

(Lišavanje ili ograničavanje prava)

Lica prema kojima se izvršavaju sankcije i mjere lišavaju se prava ili se ograničavaju u pravima samo u granicama nužnim za ostvarivanje svrhe pojedinih sankcija i mjera, u skladu sa zakonom.

Član 5.

(Odluka koja se izvršava)

- (1) Izvršenju sankcije i mjere pristupa se kad odluka kojom je izrečena sankcija, odnosno mjera postala pravosnažna.

na i ako za izvršenje sankcije, odnosno mjere nema zakonskih smetnji (u daljnjem tekstu: izvršna odluka).

- (2) Sa izvršenjem sankcije i mjere može se otpočeti i prije nego što je odluka kojom je izrečena sankcija, odnosno mjera postala pravosnažna, samo ako je to zakonom posebno predviđeno.

Član 6. (Provođenje izvršenja bez odgađanja)

- (1) Kad su ispunjeni uvjeti da se pristupi izvršenju sankcije, odnosno mjere, organ koji je izrekao sankciju, odnosno mjeru, obavezan je preduzeti potrebne radnje da se izvršenje sankcije, odnosno mjere, provede bez odgađanja, u skladu sa ovim Zakonom.
- (2) Izvršenje sankcije, odnosno mjere, može biti odgođeno samo u slučajevima i pod uvjetima predviđenim zakonom.

Član 7. (Dostavljanje odluke organu izvršenja)

Organ koji je donio prvostepenu odluku kojom je sankcija, odnosno mjera izrečena dužan je da, ako nije nadležan da je sam izvrši, izvršnu odluku dostavi organu nadležnom za izvršenje, najkasnije u roku tri dana od dana kada je odluka postala izvršna, odnosno od dana kada je tu odluku primio od višeg organa.

Član 8. (Obavezna saradnja sa ustanovama za izvršenje sankcija i mjera i pristup međunarodnih organizacija i drugih institucija osuđenim, odnosno kažnjenim licima)

- (1) Organi vlasti, ustanove i druga pravna lica, u čijem djelokrugu je primjena zdravstvenih, socijalnih, odgojnih ili drugih mjera od značaja za izvršenje pojedinih sankcija i mjera, obavezni su saradivati sa ustanovama u kojima se izvršavaju sankcije, odnosno mjere (u daljnjem tekstu: ustanove).
- (2) U cilju što potpunijeg ostvarivanja svrhe pojedinih sankcija i mjera, ustanove saraduju s pravnim licima koja bi im, prema svojoj djelatnosti, mogla pružiti pomoć.
- (3) Ustanove su dužne omogućiti domaćim i međunarodnim organizacijama i drugim institucijama nadležnim za praćenje i ostvarivanje ljudskih prava i osnovnih sloboda, pristup i razgovor sa osuđenim, odnosno kažnjenim licima, u skladu sa zakonom i odgovarajućim međunarodnim dokumentima.

Član 9. (Troškovi izvršenja)

Lice prema kojem je primijenjena sankcija, odnosno mjera, ne plaća troškove izvršenja, osim troškova novčane kazne, kao i drugih troškova u skladu sa zakonom.

Član 10. (Neplaćanje taksi)

Za podneske, službene radnje, rješenja i druge akte u vezi sa izvršenjem sankcija, odnosno mjera, ne plaća se taksa.

Član 11. (Ovlaštenja Ministarstva za pravosuđe i upravu)

- (1) Ministarstvo za pravosuđe i upravu Kantona (u daljnjem tekstu: Ministarstvo) prati i proučava izvršenje sankcija i mjera, analizira izvještaje o izvršenju pojedinih sankcija i mjera i predlaže mjere za unapređenje njihovog izvršenja.
- (2) Ministar za pravosuđe i upravu (u daljnjem tekstu: Ministar) može osnovati stručni savjet iz reda predstavnika naučnih ustanova, sudova, organa uprave, stručnih udruženja i drugih institucija koja se bave pitanjima odgoja, kriminaliteta i prekršaja, radi praćenja, proučavanja i unapređenja sistema izvršenja sankcija, odnosno mjera.

Član 12. (Poseban interes za Kanton)

Poslovi izvršenja sankcija i mjera, propisani ovim zakonom, su poslovi od posebnog interesa za Kanton.

DIO DRUGI – IZVRŠENJE NOVČANE KAZNE, RADA ZA OPĆE DOBRO NA SLOBODI I MJERA SIGURNOSTI IZREČENIH ZA UČINJENO KRIVIČNO DJELO

POGLAVLJE I. IZVRŠENJE NOVČANE KAZNE

Član 13. (Organ izvršenja)

- (1) Novčanu kaznu izrečenu osuđenom licu izvršava prvostepeni sud koji je izrekao novčanu kaznu.
- (2) Prvostepeni sud u mjestu prebivališta izvršava novčanu kaznu koja je u toku krivičnog postupka izrečena svjedoku, vještaku ili drugim učesnicima u postupku.

Član 14.**(Način izvršenja novčane kazne osuđenom licu)**

- (1) Novčana kazna izrečena osuđenom licu izvršava se na način propisan Krivičnim zakonom Federacije Bosne i Hercegovine („Službene novine Federacije Bosne i Hercegovine“ broj: 36/03, 37/03, 21/04, 69/04 i 18/05).
- (2) Novčana kazna izrečena osuđenom pravnom licu izvršava se direktnom prinudnom naplatom-skidanjem sa računa pravnog lica, u skladu sa propisima kojima se reguliše izvršni postupak.
- (3) Ako svjedok, vještak ili drugi učesnik u krivičnom postupku u roku određenom u odluci prvostepenog suda ne plati novčanu kaznu dobrovoljno, naplate će se izvršiti prinudnim putem u skladu sa propisima kojima se reguliše izvršni postupak.

Član 15.**(Troškovi izvršenja novčane kazne)**

Troškove izvršenja novčane kazne snosi osuđeni, svjedok, vještak ili drugi učesnik u postupku kojem je sud u toku krivičnog postupka izrekao novčanu kaznu.

POGLAVLJE II. RAD ZA OPĆE DOBRO NA SLOBODI**Član 16.****(Mjesto i način izvršenja rada za opće dobro na slobodi)**

- (1) Rad za opće dobro na slobodi izvršava se u mjestu prebivališta, odnosno boravišta osuđenog, odnosno kažnjenog lica na način propisan Pravilnikom o vrsti i uvjetima za izvršenje sankcije rada za opće dobro na slobodi.
- (2) Pravilnik iz stava (1) ovog člana donosi ministar.

POGLAVLJE III. IZVRŠENJE MJERA SIGURNOSTI**Odjeljak A. Zabrana vršenja poziva, aktivnosti ili funkcije****Član 17.****(Organ izvršenja i način izvršenja)**

- (1) Radi izvršenja mjere zabrane vršenja određenog poziva, aktivnosti ili funkcije, prvostepeni sud dostavlja izvršnu odluku organu uprave nadležnom za izdavanje dozvole, odnosno odobrenja za vršenje određenog poziva, aktiv-

nosti ili funkcije, radi evidentiranja izrečene mjere, kao i nadležnom inspeksijskom organu.

- (2) Izvršnu odluku, kojom je izrečena mjera sigurnosti iz stava (1) ovog člana, prvostepeni sud dostavlja i pravnom ili drugom licu kod kojeg osuđeno lice obavlja poziv, aktivnost ili djelatnost.

Član 18.**(Nadzor nad izvršenjem i prekršaji)**

- (1) Inspeksijski organ iz člana 17. stav (1) ovog zakona, kao i pravno i drugo lice iz člana 17. stava (2) ovog zakona, stara se da osuđeno lice, u roku koji je određen odlukom, ne vrši zabranjeni poziv, aktivnost ili funkciju.
- (2) Ako posebnim propisom nije drukčije određeno, osuđeno lice koje vrši poziv, aktivnost ili funkciju koja mu je zabranjena, kaznit će se za prekršaj novčanom kaznom od 200,00 do 1.000,00 KM.
- (3) Pravno lice koje osuđenom licu povjeri vršenje poziva, aktivnosti ili funkcije koja mu je zabranjena, kaznit će se za prekršaj novčanom kaznom od 3.000,00 do 10.000,00 KM, a odgovorno lice u tom pravnom licu, novčanom kaznom od 200,00 do 1.000,00 KM.

Odjeljak B. Zabrana upravljanja motornim vozilom**Član 19.****(Organ izvršenja i način izvršenja)**

Mjeru sigurnosti zabrana upravljanja motornim vozilom izvršava policijska uprava na način i po postupku propisanim zakonom i provedbenim propisom kojim se reguliše postupak i način izvršenja mjere sigurnosti i zaštitne mjere zabrane upravljanja motornim vozilom.

Odjeljak C. Oduzimanje predmeta**Član 20.****(Organ izvršenja i način izvršenja)**

- (1) Mjeru sigurnosti oduzimanje predmeta, izrečenu osuđenom licu i osuđenom pravnom licu, izvršava prvostepeni sud, po propisima kojima se reguliše izvršni postupak, a prema prirodi predmeta odredit će da li će se ti predmeti prodati po propisima izvršnog postupka ili će se uništiti ili ustupiti određenom državnom organu ili određenom pravnom licu.
- (2) Troškove, koji nastanu prinudnim izvršenjem mjere sigurnosti iz stava (1) ovog člana, snosi lice kome je ta mjera izrečena.
- (3) Sredstva ostvarena prodajom predmeta iz stava (1) ovog člana pripadaju odgovarajućem budžetu, u skladu

sa zakonom koji uređuje pripadnost javnih prihoda.

Odjeljak D. Zabrana vršenja određene privredne aktivnosti

Član 21. (Organ izvršenja i način izvršenja)

Radi izvršenja mjere sigurnosti zabrane obavljanja određene privredne aktivnosti, koja je izrečena osuđenom pravnom licu, prvostepeni sud dostavlja izvršnu odluku sudu u kojem je osuđeno pravno lice registrovano, radi upisa zabrane u registar, kao i nadležnom inspekcijском organu.

Član 22. (Nadzor nad izvršenjem i prekršaji)

- (1) Inspekcijски organ iz člana 21. ovog zakona stara se da osuđeno pravno lice ne vrši zabranjenu privrednu aktivnost.
- (2) Ako posebnim propisom nije drukčije određeno, osuđeno pravno lice koje obavlja privrednu aktivnost koja mu je zabranjena kaznit će se novčanom kaznom od 3.000,00 do 10.000,00 KM, a odgovorno lice u tom pravnom licu novčanom kaznom od 200,00 do 1.000,00 KM.

DIO TREĆI - IZVRŠENJE ODGOJNIH MJERA IZREČENIH OSUĐENOM MALOLJETNOM LICU

Član 23. (Primjena zakona u izvršenju odgojnih mjera)

Odgojne mjere (disciplinske mjere i mjere pojačanog nadzora), izrečene osuđenom maloljetnom licu, izvršavaju se na način i po postupku utvrđenom odredbama Krivičnog zakona Federacije Bosne i Hercegovine i Zakona o izvršenju krivičnih sankcija u Federaciji Bosne i Hercegovine (u daljem tekstu: Federalni zakon), koje se odnose na izvršenje odgojnih mjera i ovim Zakonom.

POGLAVLJE I. IZVRŠENJE DISCIPLINSKE MJERE UPUĆIVANJA U DISCIPLINSKI CENTAR ZA MALOLJETNIKE

Član 24. (Upućivanje u disciplinski centar za maloljetnike)

- (1) Disciplinska mjera upućivanje u disciplinski centar za maloljetnike, na određeni broj sati u praznične dane ili na određeni broj sati u toku dana izvršava se u centru

za socijalni rad prema mjestu prebivališta ili boravišta maloljetnika.

- (2) Troškove izvršenja disciplinske mjere iz stava (1) ovog člana, u dijelu koji se odnosi na rad poslije radnog vremena i rad u dane vikenda i praznika, snosi Kanton na zahtjev centra za socijalni rad koji je izvršio mjeru.
- (3) Disciplinska mjera upućivanje u disciplinski centar za maloljetnike na neprekidni boravak na utvrđeni broj dana, izvršava se u disciplinskom centru za maloljetnike osnovanom na području Federacije Bosne i Hercegovine.
- (4) Troškove izvršenja disciplinske mjere upućivanje u disciplinski centar za maloljetnike na neprekidni boravak na utvrđeni broj dana snosi Kanton na osnovu ugovora zaključenog između disciplinskog centra osnovanog na području Federacije Bosne i Hercegovine i Kantona.
- (5) Ugovor iz stava (4) ovog člana u ima Kantona zaključuje ministar.

Član 25. (Dostavljanje izvršne odluke centru za socijalni rad)

Izvršnu odluku, kojom je maloljetniku izrečena disciplinska mjera, općinski sud dostavlja centru za socijalni rad.

Član 26. (Početak izvršenja)

- (1) Centar za socijalni rad radi izvršenja disciplinske mjere upućivanje u disciplinski centar za maloljetnike na određeni broj sati u praznične dane ili na određeni broj sati u toku dana, poziva maloljetnika da se određenog dana i sata, u pratnji roditelja, usvojitelja ili staratelja, javi u centar za socijalni rad.
- (2) Centar za socijalni rad radi izvršenja disciplinske mjere upućivanje u disciplinski centar za maloljetnike na neprekidni boravak na utvrđeni broj dana, u dogovoru sa disciplinskim centrom za maloljetnike, poziva maloljetnika da se određenog dana i sata, u pratnji roditelja, usvojitelja ili staratelja, javi u disciplinski centar za maloljetnike.
- (3) Izvršenje disciplinske mjere iz člana 24. ovog zakona počinje od dana kad se maloljetnik javi u disciplinski centar za maloljetnike.

Član 27. (Obaveze roditelja, usvojitelja i staratelja i centra za socijalni rad)

- (1) Roditelj, usvojitelj ili staratelj maloljetnika dužan je da obezbijedi redovni dolazak maloljetnika u centar za socijalni rad radi izvršenja disciplinske mjere upućivanje

u disciplinski centar za maloljetnike na određeni broj sati u praznične dane ili na određeni broj sati u toku dana, a u slučaju da maloljetnik, iz opravdanih razloga, bude spriječen da dođe određenog dana u centar za socijalni rad, dužan je da o tome odmah obavijesti centar za socijalni rad.

- (2) Ako se maloljetnik određenog dana i u određeno vrijeme ne javi u centar za socijalni rad ili prestane da redovno dolazi, centar za socijalni rad o tome obavještava općinski sud, radi preduzimanja odgovarajućih mjera.

Član 28.

(Obaveze roditelja, usvojitelja i staratelja i disciplinskog centra za maloljetnike)

- (1) Roditelj, usvojitelj ili staratelj maloljetnika dužan je da obezbijedi dolazak maloljetnika u disciplinski centar za maloljetnike radi izvršenja disciplinske mjere upućivanja u disciplinski centar za maloljetnike na neprekidni boravak.
- (2) Ako se maloljetnik određenog dana i u određeno vrijeme ne javi u disciplinski centar za maloljetnike, disciplinski centar za maloljetnike o tome obavještava centar za socijalni rad i općinski sud, radi preduzimanja odgovarajućih mjera.

Član 29.

(Vrijeme izvršavanja)

- (1) Disciplinska mjera upućivanja u disciplinski centar za maloljetnike na određeni broj sati u praznične dane ili na određeni broj sati u toku dana, izvršava se između 800 i 2000 sati, u slobodnom vremenu maloljetnika, usklađenom sa školskim i radnim obavezama.
- (2) Maloljetniku, upućenom u disciplinski centar za maloljetnike na neprekidni boravak na utvrđeni broj dana, obezbjeđuje se smještaj i ishrana.
- (3) Maloljetniku, upućenom u disciplinski centar za maloljetnike na period duži od šest sati dnevno, obezbjeđuje se odgovarajući broj obroka hrane.

Član 30.

(Plan i program za rad s maloljetnikom)

- (1) Centar za socijalni rad donosi plan i program za rad s maloljetnikom kojem je izrečena disciplinska mjera upućivanje u disciplinski centar za maloljetnike na određeni broj sati u praznične dane ili na određeni broj sati u toku dana .
- (2) Disciplinska mjera upućivanje u disciplinski centar za maloljetnike na neprekidni boravak na utvrđeni broj dana izvršava se prema planu i programu disciplinskog centra u koji je maloljetnik upućen.

Član 31.

(Pridržavanje pravila kućnog reda i uputstava i savjeta)

- (1) Maloljetnik je dužan da se, u centru za socijalni rad, odnosno disciplinskom centru za maloljetnike, pridržava pravila kućnog reda i uputstava i savjeta ovlaštenih stručnih radnika.
- (2) Ako se, zbog nediscipline maloljetnika ili roditelja, staratelja ili usvojitelja, disciplinska mjera ne može izvršiti, centar za socijalni rad, najkasnije u roku od 48 sati, o tome obavještava općinski sud, radi preduzimanja odgovarajućih mjera.
- (3) Ako se, zbog nediscipline maloljetnika ili roditelja, staratelja ili usvojitelja, disciplinska mjera upućivanje u disciplinski centar za maloljetnike na neprekidni boravak na utvrđeni broj dana ne može izvršiti, disciplinski centar za maloljetnike, najkasnije u roku od 48 sati, o tome obavještava centar za socijalni rad i općinski sud, radi preduzimanja odgovarajućih mjera.

POGLAVLJE II. IZVRŠENJE MJERA POJAČANOG NADZORA

Odjeljak A. Pojačan nadzor od strane roditelja, usvojitelja ili staratelja

Član 32.

(Početak izvršenja)

Izvršenje mjere pojačanog nadzora od strane roditelja, usvojitelja ili staratelja počinje od dana kad se roditelju, usvojitelju ili staratelju maloljetnika dostavi izvršna odluka općinskog suda radi izvršenja ove mjere.

Član 33.

(Način izvršenja)

Izvršenje mjere iz člana 32. ovog zakona obuhvata stalnu i punu brigu roditelja, staratelja ili usvojitelja u odgoju maloljetnika, brigu oko razvijanja radnih navika maloljetnika, odvajanje iz sredine koja na maloljetnika štetno utiče, sređivanje prilika u kojima maloljetnik živi, razvijanje osjećaja lične odgovornosti i podsticanje da i sam učestvuje u svome preodgoju.

Član 34.

(Dužnost postupanja po uputama općinskog suda)

Ako je općinski sud dao potrebne upute i naložio određene dužnosti u pogledu mjera koje treba preduzeti za odgoj maloljetnika, njegovo liječenje i za otklanjanje štetnih

uticaja na njega, roditelji, usvojitelj ili staratelj dužni su postupati po ovim uputama i izvršavati naložene dužnosti.

Član 35.

(Provjeravanje izvršenja i pomoć roditelju, usvojitelju i staratelju)

- (1) Ako je općinski sud, pri izricanju mjere iz člana 32. ovog zakona, odredio da nadležni organ socijalne skrbi provjerava njeno izvršenje i ukazuje pomoć roditelju, usvojitelju ili staratelju, odluka općinskog suda dostavlja se centru za socijalni rad.
- (2) U slučaju iz prethodnog stava ovog člana, centar za socijalni rad dužan je da:
 - a) poziva maloljetnika i njegove roditelje, usvojitelja ili staratelja, radi vođenja razgovora o pitanjima vezanim za izvršenje izrečene mjere,
 - b) provjerava, u saradnji sa školom, preduzećem ili drugim pravnim licem, odnosno organizacijom u kojoj maloljetnik radi ili je uključen, odnos maloljetnika prema radnim obavezama, kao i njegovo ponašanje prema drugim licima,
 - c) pruža pomoć maloljetniku, putem saradnje sa odgovarajućim ustanovama, kad roditelji, usvojitelj ili staratelj nisu u stanju sami da postupe po datim uputama i nalogima.

Član 36.

(Obavještenje o promjeni prebivališta, odnosno boravišta)

Ako maloljetnik, za vrijeme izvršavanja mjere pojačanog nadzora od strane roditelja, usvojitelja ili staratelja, promijeni prebivalište, odnosno boravište, roditelji, usvojitelj ili staratelj dužni su da o tome odmah obavijeste općinski sud.

Odjeljak B. Pojačan nadzor u drugoj porodici

Član 37.

(Izvršenje i provjera izvršenja)

- (1) Izvršna odluka općinskog suda, kojom je izrečena mjera pojačanog nadzora u drugoj porodici, izvršava se u obitelji koja je primila maloljetnika i vrši nad njim pojačani nadzor.
- (2) Centar za socijalni rad vrši provjeravanje izvršenja mjere iz stava (1) ovog člana i ukazuje potrebnu pomoć porodici koja je primila maloljetnika.

Član 38.

(Iznalaženje porodici radi izvršenja)

Centar za socijalni rad, u saradnji sa nadležnim organi-

ma u mjesnim zajednicama općine, iznalazi porodici koje su voljne da prime maloljetnika i koje imaju mogućnosti da vrše nad njim pojačani nadzor.

Član 39.

(Određivanje porodici radi izvršenja)

Centar za socijalni rad određuje, iz spiska obitelji kod kojih se mogu smjestiti maloljetnici, porodica u kojoj će maloljetnik biti smješten radi izvršenja mjere pojačanog nadzora u drugoj obitelji i o tome obavještava općinski sud.

Član 40.

(Smještaj maloljetnika u porodicu u kojoj će se izvršavati mjera i troškovi izvršenja)

- (1) Centar za socijalni rad smješta maloljetnika u porodicu u kojoj će se izvršavati izrečena mjera, u skladu s propisima kojima se reguliše smještaj u drugu porodicu.
- (2) Troškove izvršenja mjere pojačanog nadzora u drugoj porodici snosi Kanton.

Član 41.

(Određivanje smještaja maloljetnika u drugu porodicu zbog izmijenjenih prilika)

Općinski sud može, na prijedlog centra za socijalni rad ili kad sam ocijeni, odrediti smještaj maloljetnika u drugu porodicu iz člana 38. ovog Zakona, ako su se prilike u porodici u kojoj je maloljetnik smješten toliko izmijenile da ne obezbjeđuju pravilno izvršenje izrečene mjere.

Član 42.

(Uticanje na sređivanje prilika u porodici iz koje je maloljetnik izdvojen)

Za vrijeme izvršenja mjere pojačanog nadzora u drugoj porodici, a u cilju obezbjeđenja uvjeta za vraćanje maloljetnika u njegovu porodicu, centar za socijalni rad dužan je da utiče na sređivanje prilika u porodici iz koje je maloljetnik izdvojen.

Član 43.

(Shodna primjena odredaba ovog Zakona)

Odredbe članova 35. i 36. ovog zakona shodno se primjenjuju i na izvršenje mjere pojačanog nadzora u drugoj porodici.

Odjeljak C. Pojačan nadzor od strane nadležnog organa socijalne skrbi**Član 44.
(Organ izvršenja)**

Odluku općinskog suda, kojom je izrečena mjera pojačanog nadzora od strane nadležnog organa socijalne skrbi, izvršava centar za socijalni rad.

**Član 45.
(Način izvršenja i saradnja)**

(1) Po prijemu izvršne odluke općinskog suda iz člana 44. ovog zakona, centar za socijalni rad dužan je da:

- a) ostvaruje neposredni kontakt s maloljetnikom i njegovom porodicom, putem razgovora, posjeta, obilazaka i na drugi pogodan način,
- b) uspostavi stalnu saradnju sa školom, odnosno pravim i drugim licem, gdje maloljetnik živi i radi.

(2) Obrazovne, odgojne, zdravstvene i druge ustanove, kao i udruženja, odnosno društva koja okupljaju djecu i omladinu, dužni su da sarađuju sa centrom za socijalni rad i da mu pružaju pomoć u izvršenju mjere iz stava (1) ovog člana.

**Član 46.
(Obavještanje o okolnostima i prilikama koje negativno utiču na izvršenje)**

Roditelji, usvojitelj ili staratelj maloljetnika dužni su da obavještaju centar za socijalni rad o okolnostima i prilikama koje negativno utiču na uspješno izvršenje mjere pojačanog nadzora od strane nadležnog organa socijalne skrbi, kako bi centar za socijalni rad preduzeo odgovarajuće mjere na koje je ovlašten zakonom.

POGLAVLJE III. ODGODA I PREKID IZVRŠENJA ODGOJNIH MJERA**Odjeljak A. Odgoda i prekid mjere upućivanja u disciplinski centar i mjere pojačanog nadzora u drugoj porodici****Član 47.
(Odgoda izvršenja)**

(1) Izvršenje odgojnih mjera upućivanja u disciplinski centar i pojačanog nadzora u drugoj porodici, može se odgoditi na molbu maloljetnika, njegovog roditelja, staratelja ili usvojitelja, bračnog druga ili na prijedlog centra za socijalni rad, u slučaju:

- a) ako je maloljetnik obolio od teže akutne bolesti;
 - b) ako se desio smrtni slučaj ili teška bolest u užoj obitelji maloljetnika;
 - c) ako se maloljetnik nalazi neposredno pred završetkom škole ili polaganja ispita za koji se pripremao, pa bi mu izvršenje odgojne mjere u ovom momentu moglo nepovoljno uticati na izvršenje tih obaveza;
 - d) ako trudnoj maloljetnici do porođaja ne preostaje više od pet mjeseci, kao i maloljetnici koja ima dijete mlađe od jedne godine života.
- (2) Izvršenje odgojne mjere u slučaju iz tačke a) stava (1) ovog člana može se odgoditi dok bolest traje, u slučaju iz tačke b) stava (1) ovog člana - najduže za tri mjeseca, u slučaju iz tačke c) stava (1) ovog člana - najduže za šest mjeseci, a u slučaju iz tačke d) stava (1) ovog člana, trudnoj maloljetnici, kao i maloljetnici koja ima dijete mlađe od jedne godine života - do navršene jedne godine života djeteta.

**Član 48.
(Molba za odgodu izvršenja)**

- (1) Molba za odgodu izvršenja odgojne mjere podnosi se općinskom sudu.
- (2) Molba iz stava (1) ovog člana podnosi se u roku od tri dana od dana prijema poziva za izvršenje odgojne mjere.
- (3) Ako je razlog za odgodu izvršenja odgojne mjere iz stava (1) tač. a) i b) člana 47. ovog zakona nastao nakon isteka roka iz stava (1) ovog člana, molba se može podnijeti do dana kad maloljetnik treba da se javi radi izvršenja odgojne mjere.
- (4) U molbi se moraju navesti razlozi, činjenice i dokazi na kojima se zasniva molba za odgodu izvršenja odgojne mjere.

**Član 49.
(Odlučivanje o molbi za odgodu izvršenja)**

- (1) O molbi za odgodu izvršenja odgojne mjere odlučuje rješenjem Općinski sud, u roku od tri dana od dana prijema molbe.
- (2) Prije donošenja rješenja iz stava (1) ovog člana, sudija za maloljetnike može povjeriti centru za socijalni rad da izvrši provjeru činjenica navedenih u molbi.
- (3) Molbu koja nije podnesena u roku iz stava (2) člana 48. ovog zakona ili koja ne sadrži razloge, dokaze i činjenice za odgodu, sud odbacuje rješenjem.
- (4) Do donošenja rješenja o molbi, odgađa se početak izvršenja odgojne mjere.

Član 50.**(Pravo žalbe protiv rješenja kojim se odbija odgoda izvršenja)**

- (1) Protiv rješenja kojim se odbija molba za odgodu izvršenja odgojne mjere, podnosilac ima pravo žalbe u roku od tri dana od dana prijema rješenja, Kantonalnom sudu u Zenici (u daljnjem tekstu: Kantonalni sud).
- (2) Kantonalni sud donosi rješenje o žalbi u roku od tri dana od dana prijema žalbe.
- (3) Rješenje iz stava (2) ovog člana je konačno i dostavlja se, u roku od tri dana, podnosiocu molbe i centru za socijalni rad.

Član 51.**(Drugi slučajevi odgode izvršenja)**

Općinski sud može donijeti rješenje o odgodi izvršenja odgojne mjere i kada je podignut zahtjev za ponavljanje krivičnog postupka.

Član 52.**(Prekid izvršenja)**

- (1) Na molbu maloljetnika, njegovog roditelja, usvojitelja, staratelja ili centra za socijalni rad, može se dozvoliti prekid izvršenja odgojne mjere.
- (2) Na prekid izvršenja odgojne mjere shodno se primjenjuju odredbe članova od 47. do 51. ovog zakona.
- (3) Vrijeme prekida ne uračunava se u vrijeme izvršenja odgojne mjere.

Odjeljak B. Odgoda i prekid zavodske odgojne mjere**Član 53.****(Odgoda i prekid zavodske odgojne mjere)**

- (1) Odredbe članova od 47. do 52. ovog zakona shodno se primjenjuju na odgodu i prekid izvršenja zavodske odgojne mjere upućivanja u odgojnu ustanovu, u odgojno-popravni dom ili u drugu ustanovu za osposobljavanje (u daljnjem tekstu: zavodska odgojna mjera).
- (2) Vrijeme prekida ne uračunava se u vrijeme izvršenja zavodske odgojne mjere.

DIO ČETVRTI - IZVRŠENJE PREKRŠAJNIH SANKCIJA**POGLAVLJE I. UKOR, NOVČANA KAZNA I RAD ZA OPĆE DOBRO NA SLOBODI****Odjeljak A. Ukori****Član 54.****(Organ izvršenja i način izvršenja)**

- (1) Izrečenu sankciju ukor u prekršajnom postupku izvršava prvostepeni sud koji je tu sankciju izrekao tako da se ista posebno evidentira u prvostepenom sudu.
- (2) Prvostepeni sud utvrdit će način vođenja evidencije iz stava (1) ovog člana.

Odjeljak B. Novčana kazna**Član 55.****(Način izvršenja novčane kazne kažnjenom licu)**

Novčana kazna izrečena kažnjenom licu izvršava se na način propisan Zakonom o prekršajima Federacije Bosne i Hercegovine („Službene novine Federacije Bosne i Hercegovine“, broj: 31/06).

Član 56.**(Troškovi izvršenja novčane kazne)**

Troškove izvršenja novčane kazne snosi kažnjeni.

Odjeljak C. Rad za opće dobro na slobodi**Član 57.****(Mjesto i način izvršenja rada za opće dobro na slobodi)**

- (1) Rad za opće dobro na slobodi izvršava se u mjestu prebivališta, odnosno boravišta kažnjelog lica na način propisan Pravilnikom o vrsti i uvjetima za izvršenje sankcije rada za opće dobro na slobodi.
- (2) Pravilnik iz stava (1) ovog člana donosi ministar.

POGLAVLJE II. ZAŠTITNE MJERE**Odjeljak A. Oduzimanje predmeta****Član 58.****(Organ izvršenja i način izvršenja)**

- (1) Zaštitnu mjeru oduzimanja predmeta izvršava prvostepeni sud, odnosno organ koji je tu zaštitnu mjeru izrekao.
- (2) Prema prirodi predmeta prvostepeni sud, odnosno organ koji je prekršajnim nalogom tu zaštitnu mjeru izrekao odredit će da li će se ti predmeti prodati po propisima izvršnog postupka ili će se uništiti ili ustupiti određenoj osobi.

- nom državnom organu ili određenom pravnom licu.
- (3) Sredstva ostvarena prodajom predmeta iz stava (1) ovog člana pripadaju odgovarajućem budžetu, u skladu sa zakonom koji uređuje pripadnost javnih prihoda.
- (4) Troškove koji nastanu prinudnim izvršenjem zaštitne mjere iz stava (1) ovog člana snosi lice kome je ta mjera izrečena.

Odjeljak B. Zabrana vršenja poziva, djelatnosti ili dužnosti

Član 59. (Organ izvršenja i način izvršenja)

Zaštitnu mjeru zabrane vršenja poziva, djelatnosti ili dužnosti izvršava prvostepeni sud, odnosno organ koji je tu zaštitnu mjeru izrekao na način propisan u članu 17. i 18. ovog zakona za izvršenje mjere sigurnosti zabrane vršenja poziva, aktivnosti ili funkcije.

Odjeljak C. Potpuna ili djelimična zabrana upravljanja motornim vozilom

Član 60. (Organ izvršenja i način izvršenja)

Zaštitnu mjeru potpune ili djelimične zabrane upravljanja motornim vozilom izvršava prvostepeni sud, odnosno organ koji je tu zaštitnu mjeru izrekao na način propisan u članu 19. ovog zakona za izvršenje mjere sigurnosti zabrane upravljanja motornim vozilom.

Odjeljak D. Vanbolničko liječenje od zavisnosti

Član 61. (Organ izvršenja i način izvršenja)

- (1) Zaštitna mjera vanbolničko liječenje od zavisnosti izvršava se u ovlaštenoj ustanovi koju odredi prvostepeni sud, na način koji odredi prvostepeni sud.
- (2) Troškove obaveznog liječenja, za lice koje nije zdravstveno osigurano, kao i dio troškova koje, po posebnim propisima, snosi sam osiguranik, za kažnjeno lice koje ima prebivalište na području Kantona, snosi Kanton.

Odjeljak E. Druge zaštitne mjere propisane posebnim zakonom

Član 62. (Način i uvjeti izvršenja)

Druge zaštitne mjere propisane posebnim zakonom izvršavaju se na način i pod uvjetima utvrđenim tim zakonom i zakonom kojim su regulisani prekršaji u Federaciji Bosne

i Hercegovine.

DIO PETI - IZVJEŠTAVANJE O IZVRŠENJU SANKCIJA

Član 63. (Podnošenje izvještaja)

- (1) Organi iz člana 3. ovog zakona, dužni su podnositi izvještaj Skupštini Kantona o izvršenju sankcija iz člana 1. ovog zakona, najmanje jedanput godišnje.
- (2) Organi iz stava (1) ovog člana dužni su, po zahtjevu Skupštine Kantona ili Ministarstva, podnositi izvještaje o izvršenju sankcija i za kraći period ili samo za određenu vrstu sankcija.

Član 64. (Metodologija podnošenja izvještaja)

Izvještaj o izvršenju sankcija iz člana 63. ovog zakona podnosi se putem Ministarstva, po metodologiji koju, pravilnikom, utvrđuje ministar.

DIO ŠESTI - PRIJELAZNE I ZAVRŠNE ODREDBE

Član 65. (Izvršavanje pravosnažnih odluka inostranih sudova i sankcija izrečenih stranim državljanima i licima bez državljanstva)

- (1) Po odredbama ovog zakona izvršavaju se i pravosnažne odluke inostranih sudova, ukoliko posebnim zakonom Bosne i Hercegovine ili međunarodnim ugovorom nije drukčije određeno.
- (2) Po odredbama ovog zakona izvršavaju se i sankcije izrečene stranim državljanima i licima bez državljanstva, ukoliko posebnim zakonom Bosne i Hercegovine ili međunarodnim ugovorom nije drukčije određeno.

Član 66. (Rok za donošenje pravilnika)

Pravilnik iz člana 16., 57. i 64. ovog zakona, donijet će ministar u roku od 90 dana od dana stupanja na snagu ovog zakona.

Član 67. (Ravnopravnost spolova)

Gramatička terminologija korišćenja muškog ili ženskog roda u ovom zakonu podrazumijeva uključivanje oba roda.

Član 68.
(Prestanak važenja Zakona)

Stupanjem na snagu ovog zakona prestaje da važi Zakon o izvršenju sankcija u Zeničko-dobojskom kantonu („Službene novine Zeničko-dobojskog kantona“, broj:16/00, 6/01 i 15/03).

Član 69.
(Stupanje na snagu Zakona)

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-8662/09

PREDSJEDAVALAČ

Datum, 01.04.2009. godine

Zenica

Sejad Zaimović, s.r.

79.

Na osnovu člana 37. stav 1. tačka f. Ustava Zeničko-dobojskog kantona, Skupština Zeničko-dobojskog kantona, na 28. sjednici, održanoj 31.03.2009. godine, donosi:

ZAKON
O VISOKOM OBRAZOVANJU

DIO PRVI - UVODNE ODREDBE

Član 1.
(Predmet zakona)

Ovim zakonom uređuju se sistem, uvjeti i način obavljanja djelatnosti visokog obrazovanja, finansiranje, kao i druga pitanja od značaja za obavljanje ove djelatnosti na području Zeničko-dobojskog kantona (u daljem tekstu: Kanton).

Član 2.
(Djelatnost visokog obrazovanja)

Djelatnost visokog obrazovanja je od posebnog društvenog interesa za Kanton i dio je međunarodnog, a posebno evropskog obrazovnog, naučnog, odnosno umjetničkog prostora.

POGLAVLJE I. CILJEVI I PRINCIPI VISOKOG OBRAZOVANJA

Odjeljak A. Osnovni ciljevi i principi

Član 3.
(Osnovni ciljevi visokog obrazovanja)

Osnovni ciljevi visokog obrazovanja su:

- a) ustanovljavati, razvijati, štiti i prenositi znanje i sposobnosti putem nastave i naučnoistraživačkog rada, i time doprinosti razvoju sposobnosti pojedinca i društva;
- b) pružiti mogućnost građanima da, u skladu s propisima, pod jednakim uvjetima uživaju korist visokog obrazovanja cijeli život;
- c) razvoj nauke i unapređivanje umjetničkog stvaralaštva.

Član 4.
(Strategija programa razvoja)

- (1) Razvoj djelatnosti visokog obrazovanja na području Kantona utvrđuje se Strategijom razvoja visokog obrazovanja, koju donosi Skupština Zeničko-dobojskog kantona (u daljem tekstu: Skupština Kantona), na prijedlog Vlade Zeničko-dobojskog kantona (u daljem tekstu: Vlada Kantona).
- (2) Strategijom razvoja visokog obrazovanja utvrđuju se strateški interesi i potrebe Kantona u oblasti visokog obrazovanja, mjere za obezbjeđenje razvoja i unapređenja kvaliteta visokog obrazovanja, finansiranje, kao i druga pitanja od značaja za razvoj visokoškolske djelatnosti na području Kantona.

Član 5.
(Principi visokog obrazovanja)

Djelatnost visokog obrazovanja se temelji na sljedećim principima:

- a) akademskim slobodama, akademskoj samoupravi i autonomiji visokoškolske ustanove;
- b) jedinstvu nastave i naučnoistraživačkog, odnosno umjetničkog rada;
- c) otvorenosti visokoškolske ustanove prema javnosti, građanima i lokalnoj zajednici;
- d) uvažavanju evropskih humanističkih i demokratskih vrijednosti, te usklađivanju s evropskim sistemom visokog obrazovanja;
- e) poštivanju ljudskih prava i građanskih sloboda, uključujući zabranu svih oblika diskriminacije;
- f) interakciji sa društvenom zajednicom i obavezi visokoškolske ustanove da razvija društvenu odgovornost studenata i drugih članova akademske zajednice;
- g) učešću studenata u upravljanju i odlučivanju, posebno u vezi sa pitanjima koja su od značaja za kvalitet nastave;
- h) ravnopravnosti visokoškolskih ustanova bez obzira na oblik vlasništva, odnosno na to ko je osnivač;
- i) afirmaciji konkurencije obrazovnih i istraživačkih usluga radi povećanja kvaliteta i efikasnosti visokoškolskog sistema;

organa, prije stupanja na snagu ovog zakona, primjenjivat će se odredbe Zakona o porezu na promet nekretnina - Prečišćeni tekst („Službene novine Zeničko-dobojskog kantona“, broj: 13/08).

Članak 37. (Prestanak važenja Zakona)

Danom početka primjene ovog zakona prestaje da važi Zakon o porezu na promet nekretnina - Prečišćeni tekst („Službene novine Zeničko-dobojskog kantona“, broj:13/08).

Članak 38. (Stupanje na snagu Zakona)

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-8661/09

PREDSJEDATELJ

Datum, 01.04.2009. godine

Zenica

Sejad Zaimović, v.r.

78.

Na temelju članka 37. stavak 1. točka f. Ustava Zeničko-dobojskog kantona, članka 1. stavak 2. i članaka 196. i 219. Zakona o izvršenju krivičnih sankcija u Federaciji Bosne i Hercegovine („Službene novine Federacije BiH“, broj: 44/98 i 42/99) i članka 44. stavak 7. Krivičnog zakona Federacije Bosne i Hercegovine („Službene novine Federacije Bosne i Hercegovine“ broj: 36/03, 37/03, 21/04, 69/04 i 18/05), Skupština Zeničko-dobojskog kantona, na 28. sjednici održanoj 31.03.2009. godine, donosi:

ZAKON O IZVRŠENJU SANKCIJA U ZENIČKO- DOBOJSKOM KANTONU

DIO PRVI - TEMELJNE ODREDBE

Članak 1. (Kazalo)

Ovim Zakonom uređuje se izvršenje novčane kazne, mjera sigurnosti i odgojnih mjera izrečenih učiniocu krivičnog djela, odgoda i prekid izvršenja odgojnih mjera, izvršenje prekršajnih sankcija, kao i druga pitanja od značaja za izvršenje sankcija u Zeničko-dobojskom kantonu (u daljnjem tekstu: Kanton).

Članak 2. (Način izvršenja sankcija i mjera)

Sankcije i mjere iz članka 1. ovog Zakona, izrečene učiniocu krivičnog djela (u daljnjem tekstu: osuđena osoba) i prekršaja (u daljnjem tekstu: kažnjena osoba) izvršavaju se na način uređen Zakonom o izvršenju krivičnih sankcija u Federaciji Bosne i Hercegovine i ovim zakonom ako posebnim zakonom nije drugačije propisano.

Članak 3. (Organi izvršenja sankcija i mjera)

- (1) Na teritoriji Kantona, sankcije i mjere iz članka 1. ovog Zakona, za osuđene osobe i kažnjene osobe, koja imaju prebivalište, boravište, odnosno sjedište na teritoriji Kantona (u daljnjem tekstu: prebivalište), izvršavaju slijedeći organi:
 - a) sud koji je donio prvostepenu odluku kojom je sankcija izrečena (u daljnjem tekstu: prvostepeni sud),
 - b) centar za socijalni rad -služba socijalne zaštite općine u kojoj osuđena maloljetna osoba ima prebivalište (u daljnjem tekstu: centar za socijalni rad),
 - c) Ministarstvo unutarnjih poslova Kantona - policijska uprava općine na teritoriji Kantona u kojoj osuđeno, odnosno kažnjena osoba ima prebivalište (u daljnjem tekstu: policijska uprava),
 - d) mjerodavni inspeksijski organ čije je sjedište na teritoriji Kantona (u daljnjem tekstu: inspeksijski organ).
- (2) Organi iz stavka (1) ovog članka izvršavaju i sankcije i mjere koje su osuđenim, odnosno kažnjenim osobama, koja imaju prebivalište na teritoriji Kantona, izrekli sudovi i drugi ovlašteni organi čije sjedište nije na teritoriji Kantona.
- (3) Sankcije i mjere koje su osuđenim, odnosno kažnjenim osobama, koja nemaju prebivalište, odnosno sjedište na teritoriji Kantona, izrekli sudovi ili drugi organi čije je sjedište na teritoriji Kantona, izvršavaju ovlašteni organi određeni zakonom kantona u kojem osuđeno, odnosno kažnjena osoba ima prebivalište.

Članak 4. (Lišavanje ili ograničavanje prava)

Osobe prema kojima se izvršavaju sankcije i mjere lišavaju se prava ili se ograničavaju u pravima samo u granicama nužnim za ostvarivanje svrhe pojedinih sankcija i mjera, sukladno zakonu.

Članak 5. (Odluka koja se izvršava)

- (1) Izvršenju sankcije i mjere pristupa se kad odluka kojom

je izrečena sankcija, odnosno mjera postala pravosnažna i ako za izvršenje sankcije, odnosno mjere nema zakonskih smetnji (u daljnjem tekstu: izvršna odluka).

- (2) Sa izvršenjem sankcije i mjere može se otpočeti i prije nego što je odluka kojom je izrečena sankcija, odnosno mjera postala pravosnažna, samo ako je to zakonom posebno predviđeno.

Članak 6. (Provođenje izvršenja bez odgađanja)

- (1) Kad su ispunjeni uvjeti da se pristupi izvršenju sankcije, odnosno mjere, organ koji je izrekao sankciju, odnosno mjeru, obavezan je preduzeti potrebne radnje da se izvršenje sankcije, odnosno mjere, provede bez odgađanja, sukladno ovom Zakonu.
- (2) Izvršenje sankcije, odnosno mjere, može biti odgođeno samo u slučajevima i pod uvjetima predviđenim zakonom.

Članak 7. (Dostavljanje odluke organu izvršenja)

Organ koji je donio prvostepenu odluku kojom je sankcija, odnosno mjera izrečena dužan je da, ako nije mjerodavan da je sam izvrši, izvršnu odluku dostavi organu mjerodavnom za izvršenje, najkasnije u roku tri dana od dana kada je odluka postala izvršna, odnosno od dana kada je tu odluku primio od višeg organa.

Članak 8. (Obvezna suradnja sa ustanovama za izvršenje sankcija i mjera i pristup međunarodnih organizacija i drugih institucija osuđenim, odnosno kažnjenim osobama)

- (1) Organi vlasti, ustanove i druge pravne osobe, u čijem djelokrugu je primjena zdravstvenih, socijalnih, odgojnih ili drugih mjera od značaja za izvršenje pojedinih sankcija i mjera, obvezni su surađivati sa ustanovama u kojima se izvršavaju sankcije, odnosno mjere (u daljnjem tekstu: ustanove).
- (2) U cilju što potpunijeg ostvarivanja svrhe pojedinih sankcija i mjera, ustanove surađuju s pravnim osobama koja bi im, prema svojoj djelatnosti, mogla pružiti pomoć.
- (3) Ustanove su dužne omogućiti domaćim i međunarodnim organizacijama i drugim institucijama mjerodavnim za praćenje i ostvarivanje ljudskih prava i temeljnih sloboda, pristup i razgovor sa osuđenim, odnosno kažnjenim osobama, sukladno zakonu i odgovarajućim međunarodnim dokumentima.

Članak 9. (Troškovi izvršenja)

Osoba prema kojoj je primijenjena sankcija, odnosno mjera, ne plaća troškove izvršenja, osim troškova novčane kazne, kao i drugih troškova sukladno zakonu.

Članak 10. (Neplaćanje taksi)

Za podneske, službene radnje, rješenja i druge akte u vezi sa izvršenjem sankcija, odnosno mjera, ne plaća se taksa.

Članak 11. (Ovlaštenja Ministarstva za pravosuđe i upravu)

- (1) Ministarstvo za pravosuđe i upravu Kantona (u daljnjem tekstu: Ministarstvo) prati i proučava izvršenje sankcija i mjera, analizira izvještaje o izvršenju pojedinih sankcija i mjera i predlaže mjere za unapređenje njihovog izvršenja.
- (2) Ministar za pravosuđe i upravu (u daljnjem tekstu: Ministar) može osnovati stručni savjet iz reda predstavnika naučnih ustanova, sudova, organa uprave, stručnih udruženja i drugih institucija koja se bave pitanjima odgoja, kriminaliteta i prekršaja, radi praćenja, proučavanja i unapređenja sistema izvršenja sankcija, odnosno mjera.

Članak 12. (Poseban interes za Kanton)

Poslovi izvršenja sankcija i mjera, propisani ovim zakonom, su poslovi od posebnog interesa za Kanton.

DIO DRUGI – IZVRŠENJE NOVČANE KAZNE, RADA ZA OPĆE DOBRO NA SLOBODI I MJERA SIGURNOSTI IZREČENIH ZA UČINJENO KRIVIČNO DJELO

POGLAVLJE I. IZVRŠENJE NOVČANE KAZNE

Članak 13. (Organ izvršenja)

- (1) Novčanu kaznu izrečenu osuđenoj osobi izvršava prvostepeni sud koji je izrekao novčanu kaznu.
- (2) Prvostepeni sud u mjestu prebivališta izvršava novčanu kaznu koja je u toku krivičnog postupka izrečena svjedoku, vještaku ili drugim učesnicima u postupku.

Članak 14.**(Način izvršenja novčane kazne osuđenoj osobi)**

- (1) Novčana kazna izrečena osuđenoj osobi izvršava se na način propisan Krivičnim zakonom Federacije Bosne i Hercegovine („Službene novine Federacije Bosne i Hercegovine“ broj: 36/03, 37/03, 21/04, 69/04 i 18/05).
- (2) Novčana kazna izrečena osuđenoj pravnoj osobi izvršava se direktnom prinudnom naplatom-skidanjem sa računa pravne osobe, sukladno propisima kojima se reguliše izvršni postupak.
- (3) Ako svjedok, vještak ili drugi učesnik u krivičnom postupku u roku određenom u odluci prvostepenog suda ne plati novčanu kaznu dobrovoljno, naplate će se izvršiti prinudnim putem sukladno propisima kojima se reguliše izvršni postupak.

Članak 15.**(Troškovi izvršenja novčane kazne)**

Troškove izvršenja novčane kazne snosi osuđeni, svjedok, vještak ili drugi učesnik u postupku kojem je sud u toku krivičnog postupka izrekao novčanu kaznu.

POGLAVLJE II. RAD ZA OPĆE DOBRO NA SLOBODI**Članak 16.****(Mjesto i način izvršenja rada za opće dobro na slobodi)**

- (1) Rad za opće dobro na slobodi izvršava se u mjestu prebivališta, odnosno boravišta osuđenog, odnosno kažnjene osobe na način propisan Pravilnikom o vrsti i uvjetima za izvršenje sankcije rada za opće dobro na slobodi.
- (2) Pravilnik iz stava (1) ovog člana donosi ministar.

POGLAVLJE III. IZVRŠENJE MJERA SIGURNOSTI**Odjeljak A. Zabrana vršenja poziva, aktivnosti ili funkcije****Članak 17.****(Organ izvršenja i način izvršenja)**

- (1) Radi izvršenja mjere zabrane vršenja određenog poziva, aktivnosti ili funkcije, prvostepeni sud dostavlja izvršnu odluku organu uprave mjerodavnom za izdavanje dozvole, odnosno odobrenja za vršenje određenog po-

ziva, aktivnosti ili funkcije, radi evidentiranja izrečene mjere, kao i mjerodavnom inspekcijском organu.

- (2) Izvršnu odluku, kojom je izrečena mjera sigurnosti iz stavka (1) ovog članka, prvostepeni sud dostavlja i pravnom ili drugom licu kod kojeg osuđena osoba obavlja poziv, aktivnost ili djelatnost.

Članak 18.**(Nadzor nad izvršenjem i prekršaji)**

- (1) Inspekcijски organ iz članka 17. stavak (1) ovog zakona, kao i pravno i druga osoba iz članka 17. stavka (2) ovog zakona, stara se da osuđena osoba, u roku koji je određen odlukom, ne vrši zabranjeni poziv, aktivnost ili funkciju.
- (2) Ako posebnim propisom nije drukčije određeno, osuđeno lice koje vrši poziv, aktivnost ili funkciju koja mu je zabranjena, kaznit će se za prekršaj novčanom kaznom od 200,00 do 1.000,00 KM.
- (3) Pravna osoba koja osuđenom licu povjeri vršenje poziva, aktivnosti ili funkcije koja mu je zabranjena, kaznit će se za prekršaj novčanom kaznom od 3.000,00 do 10.000,00 KM, a odgovorna osoba u toj pravnoj osobi, novčanom kaznom od 200,00 do 1.000,00 KM.

Odjeljak B. Zabrana upravljanja motornim vozilom**Članak 19.****(Organ izvršenja i način izvršenja)**

Mjeru sigurnosti zabrana upravljanja motornim vozilom izvršava policijska uprava na način i po postupku propisanom zakonom i provedbenim propisom kojim se reguliše postupak i način izvršenja mjere sigurnosti i zaštitne mjere zabrane upravljanja motornim vozilom.

Odjeljak C. Oduzimanje predmeta**Članak 20.****(Organ izvršenja i način izvršenja)**

- (1) Mjeru sigurnosti oduzimanje predmeta, izrečenu osuđenoj osobi i osuđenoj pravnoj osobi, izvršava prvostepeni sud, po propisima kojima se reguliše izvršni postupak, a prema prirodi predmeta odredit će da li će se ti predmeti prodati po propisima izvršnog postupka ili će se uništiti ili ustupiti određenom državnom organu ili određenoj pravnoj osobi.
- (2) Troškove, koji nastanu prinudnim izvršenjem mjere sigurnosti iz stavka (1) ovog članka, snosi lice kome je ta mjera izrečena.
- (3) Sredstva ostvarena prodajom predmeta iz stavka (1) ovog članka pripadaju odgovarajućem proračunu, su-

kladno zakonu koji uređuje pripadnost javnih prihoda.

Odjeljak D. Zabrana vršenja određene privredne aktivnosti

Članak 21. (Organ izvršenja i način izvršenja)

Radi izvršenja mjere sigurnosti zabrane obavljanja određene gospodarske aktivnosti, koja je izrečena osuđenoj pravnoj osobi, prvostepeni sud dostavlja izvršnu odluku sudu u kojem je osuđena pravna osoba registrovana, radi upisa zabrane u registar, kao i mjerodavnom inspekcijском organu.

Članak 22. (Nadzor nad izvršenjem i prekršaji)

- (1) Inspekcijски organ iz članka 21. ovog zakona stara se da osuđena pravna osoba ne vrši zabranjenu gospodarsku aktivnost.
- (2) Ako posebnim propisom nije drukčije određeno, osuđena pravna osoba koja obavlja gospodarsku aktivnost koja mu je zabranjena kaznit će se novčanom kaznom od 3.000,00 do 10.000,00 KM, a odgovorna osoba u toj pravnoj osobi novčanom kaznom od 200,00 do 1.000,00 KM.

DIO TREĆI - IZVRŠENJE ODGOJNIH MJERA IZREČENIH OSUĐENOJ MALOLJETNOJ OSOBI

Članak 23. (Primjena zakona u izvršenju odgojnih mjera)

Odgojne mjere (disciplinske mjere i mjere pojačanog nadzora), izrečene osuđenoj maloljetnoj osobi, izvršavaju se na način i po postupku utvrđenom odredbama Krivičnog zakona Federacije Bosne i Hercegovine i Zakona o izvršenju krivičnih sankcija u Federaciji Bosne i Hercegovine (u daljem tekstu: Federalni zakon), koje se odnose na izvršenje odgojnih mjera i ovim Zakonom.

POGLAVLJE I. IZVRŠENJE DISCIPLINSKE MJERE UPUĆIVANJA U DISCIPLINSKI CENTAR ZA MALOLJETNIKE

Članak 24. (Upućivanje u disciplinski centar za maloljetnike)

- (1) Disciplinska mjera upućivanje u disciplinski centar za maloljetnike, na određeni broj sati u praznične dane ili na određeni broj sati u toku dana izvršava se u centru

za socijalni rad prema mjestu prebivališta ili boravišta maloljetnika.

- (2) Troškove izvršenja disciplinske mjere iz stavka (1) ovog članka, u dijelu koji se odnosi na rad poslije radnog vremena i rad u dane vikenda i praznika, snosi Kanton na zahtjev centra za socijalni rad koji je izvršio mjeru.
- (3) Disciplinska mjera upućivanje u disciplinski centar za maloljetnike na neprekidni boravak na utvrđeni broj dana, izvršava se u disciplinskom centru za maloljetnike osnovanom na području Federacije Bosne i Hercegovine.
- (4) Troškove izvršenja disciplinske mjere upućivanje u disciplinski centar za maloljetnike na neprekidni boravak na utvrđeni broj dana snosi Kanton na temelju ugovora zaključenog između disciplinskog centra osnovanog na području Federacije Bosne i Hercegovine i Kantona.
- (5) Ugovor iz stavka (4) ovog članka u ima Kantona zaključuje ministar.

Članak 25. (Dostavljanje izvršne odluke centru za socijalni rad)

Izvršnu odluku, kojom je maloljetniku izrečena disciplinska mjera, općinski sud dostavlja centru za socijalni rad.

Članak 26. (Početak izvršenja)

- (1) Centar za socijalni rad radi izvršenja disciplinske mjere upućivanje u disciplinski centar za maloljetnike na određeni broj sati u praznične dane ili na određeni broj sati u toku dana, poziva maloljetnika da se određenog dana i sata, u pratnji roditelja, usvojitelja ili staratelja, javi u centar za socijalni rad.
- (2) Centar za socijalni rad radi izvršenja disciplinske mjere upućivanje u disciplinski centar za maloljetnike na neprekidni boravak na utvrđeni broj dana, u dogovoru sa disciplinskim centrom za maloljetnike, poziva maloljetnika da se određenog dana i sata, u pratnji roditelja, usvojitelja ili staratelja, javi u disciplinski centar za maloljetnike.
- (3) Izvršenje disciplinske mjere iz članka 24. ovog zakona počinje od dana kad se maloljetnik javi u disciplinski centar za maloljetnike.

Članak 27. (Obveze roditelja, usvojitelja i staratelja i centra za socijalni rad)

- (1) Roditelj, usvojitelj ili staratelj maloljetnika dužan je da obezbijedi redoviti dolazak maloljetnika u centar za socijalni rad radi izvršenja disciplinske mjere upućivanje

u disciplinski centar za maloljetnike na određeni broj sati u praznične dane ili na određeni broj sati u toku dana, a u slučaju da maloljetnik, iz opravdanih razloga, bude spriječen da dođe određenog dana u centar za socijalni rad, dužan je da o tome odmah obavijesti centar za socijalni rad.

- (2) Ako se maloljetnik određenog dana i u određeno vrijeme ne javi u centar za socijalni rad ili prestane da redovito dolazi, centar za socijalni rad o tome obavještava općinski sud, radi preduzimanja odgovarajućih mjera.

Članak 28.

(Obveze roditelja, usvojitelja i staratelja i disciplinskog centra za maloljetnike)

- (1) Roditelj, usvojitelj ili staratelj maloljetnika dužan je da obezbijedi dolazak maloljetnika u disciplinski centar za maloljetnike radi izvršenja disciplinske mjere upućivanja u disciplinski centar za maloljetnike na neprekidni boravak.
- (2) Ako se maloljetnik određenog dana i u određeno vrijeme ne javi u disciplinski centar za maloljetnike, disciplinski centar za maloljetnike o tome obavještava centar za socijalni rad i općinski sud, radi preduzimanja odgovarajućih mjera.

Članak 29.

(Vrijeme izvršavanja)

- (1) Disciplinska mjera upućivanja u disciplinski centar za maloljetnike na određeni broj sati u praznične dane ili na određeni broj sati u toku dana, izvršava se između 800 i 2000 sati, u slobodnom vremenu maloljetnika, usklađenom sa školskim i radnim obvezama.
- (2) Maloljetniku, upućenom u disciplinski centar za maloljetnike na neprekidni boravak na utvrđeni broj dana, obezbjeđuje se smještaj i ishrana.
- (3) Maloljetniku, upućenom u disciplinski centar za maloljetnike na period duži od šest sati dnevno, obezbjeđuje se odgovarajući broj obroka hrane.

Članak 30.

(Plan i program za rad s maloljetnikom)

- (1) Centar za socijalni rad donosi plan i program za rad s maloljetnikom kojem je izrečena disciplinska mjera upućivanje u disciplinski centar za maloljetnike na određeni broj sati u praznične dane ili na određeni broj sati u toku dana .
- (2) Disciplinska mjera upućivanje u disciplinski centar za maloljetnike na neprekidni boravak na utvrđeni broj dana izvršava se prema planu i programu disciplinskog centra u koji je maloljetnik upućen.

Članak 31.

(Pridržavanje pravila kućnog reda i uputstava i savjeta)

- (1) Maloljetnik je dužan da se, u centru za socijalni rad, odnosno disciplinskom centru za maloljetnike, pridržava pravila kućnog reda i uputstava i savjeta ovlaštenih stručnih radnika.
- (2) Ako se, zbog nediscipline maloljetnika ili roditelja, staratelja ili usvojitelja, disciplinska mjera ne može izvršiti, centar za socijalni rad, najkasnije u roku od 48 sati, o tome obavještava općinski sud, radi preduzimanja odgovarajućih mjera.
- (3) Ako se, zbog nediscipline maloljetnika ili roditelja, staratelja ili usvojitelja, disciplinska mjera upućivanje u disciplinski centar za maloljetnike na neprekidni boravak na utvrđeni broj dana ne može izvršiti, disciplinski centar za maloljetnike, najkasnije u roku od 48 sati, o tome obavještava centar za socijalni rad i općinski sud, radi preduzimanja odgovarajućih mjera.

POGLAVLJE II. IZVRŠENJE MJERA POJAČANOG NADZORA

Odjeljak A. Pojačan nadzor od strane roditelja, usvojitelja ili staratelja

Članak 32.

(Početak izvršenja)

Izvršenje mjere pojačanog nadzora od strane roditelja, usvojitelja ili staratelja počinje od dana kad se roditelju, usvojitelju ili staratelju maloljetnika dostavi izvršna odluka općinskog suda radi izvršenja ove mjere.

Članak 33.

(Način izvršenja)

Izvršenje mjere iz članka 32. ovog zakona obuhvata stalnu i punu brigu roditelja, staratelja ili usvojitelja u odgoju maloljetnika, brigu oko razvijanja radnih navika maloljetnika, odvajanje iz sredine koja na maloljetnika štetno utiče, sređivanje prilika u kojima maloljetnik živi, razvijanje osjećaja osobne odgovornosti i poticanje da i sam učestvuje u svome preodgoju.

Članak 34.

(Dužnost postupanja po uputama općinskog suda)

Ako je općinski sud dao potrebne upute i naložio određene dužnosti u pogledu mjera koje treba preduzeti za odgoj maloljetnika, njegovo liječenje i za otklanjanje štetnih

uticaja na njega, roditelji, usvojitelj ili staratelj dužni su postupati po ovim uputama i izvršavati naložene dužnosti.

Članak 35.

(Provjeravanje izvršenja i pomoć roditelju, usvojitelju i staratelju)

- (1) Ako je općinski sud, pri izricanju mjere iz članka 32. ovog zakona, odredio da mjerodavni organ socijalne skrbi provjerava njeno izvršenje i ukazuje pomoć roditelju, usvojitelju ili staratelju, odluka općinskog suda dostavlja se centru za socijalni rad.
- (2) U slučaju iz prethodnog stavka ovog članka, centar za socijalni rad dužan je da:
 - a) poziva maloljetnika i njegove roditelje, usvojitelja ili staratelja, radi vođenja razgovora o pitanjima vezanim za izvršenje izrečene mjere,
 - b) provjerava, u suradnji sa školom, poduzećem ili drugom pravnom osobom, odnosno organizacijom u kojoj maloljetnik radi ili je uključen, odnos maloljetnika prema radnim obvezama, kao i njegovo ponašanje prema drugim osobama,
 - c) pruža pomoć maloljetniku, putem suradnje sa odgovarajućim ustanovama, kad roditelji, usvojitelj ili staratelj nisu u stanju sami da postupe po datim uputama i nalogima.

Članak 36.

(Obavještenje o promjeni prebivališta, odnosno boravišta)

Ako maloljetnik, za vrijeme izvršavanja mjere pojačanog nadzora od strane roditelja, usvojitelja ili staratelja, promijeni prebivalište, odnosno boravište, roditelji, usvojitelj ili staratelj dužni su da o tome odmah obavijeste općinski sud.

Odjeljak B. Pojačan nadzor u drugoj obitelji

Članak 37.

(Izvršenje i provjera izvršenja)

- (1) Izvršna odluka općinskog suda, kojom je izrečena mjera pojačanog nadzora u drugoj obitelji, izvršava se u obitelji koja je primila maloljetnika i vrši nad njim pojačani nadzor.
- (2) Centar za socijalni rad vrši provjeravanje izvršenja mjere iz stavka (1) ovog članka i ukazuje potrebnu pomoć obitelji koja je primila maloljetnika.

Članak 38.

(Iznalaženje obitelji radi izvršenja)

Centar za socijalni rad, u suradnji sa mjerodavnim orga-

nima u mjesnim zajednicama općine, iznalazi obitelji koje su voljne da prime maloljetnika i koje imaju mogućnosti da vrše nad njim pojačani nadzor.

Članak 39.

(Određivanje obitelji radi izvršenja)

Centar za socijalni rad određuje, iz spiska obitelji kod kojih se mogu smjestiti maloljetnici, obitelj u kojoj će maloljetnik biti smješten radi izvršenja mjere pojačanog nadzora u drugoj obitelji i o tome obavještava općinski sud.

Članak 40.

(Smještaj maloljetnika u obitelj u kojoj će se izvršavati mjera i troškovi izvršenja)

- (1) Centar za socijalni rad smješta maloljetnika u obitelj u kojoj će se izvršavati izrečena mjera, sukladno propisima kojima se reguliše smještaj u drugu obitelj.
- (2) Troškove izvršenja mjere pojačanog nadzora u drugoj obitelji snosi Kanton.

Članak 41.

(Određivanje smještaja maloljetnika u drugu obitelj zbog izmijenjenih prilika)

Općinski sud može, na prijedlog centra za socijalni rad ili kad sam ocijeni, odrediti smještaj maloljetnika u drugu obitelj iz članka 38. ovog Zakona, ako su se prilike u obitelji u kojoj je maloljetnik smješten toliko izmijenile da ne obezbjeđuju pravilno izvršenje izrečene mjere.

Članak 42.

(Uticanje na sređivanje prilika u obitelji iz koje je maloljetnik izdvojen)

Za vrijeme izvršenja mjere pojačanog nadzora u drugoj obitelji, a u cilju obezbjeđenja uvjeta za vraćanje maloljetnika u njegovu obitelj, centar za socijalni rad dužan je da utiče na sređivanje prilika u obitelji iz koje je maloljetnik izdvojen.

Članak 43.

(Shodna primjena odredaba ovog Zakona)

Odredbe članaka 35. i 36. ovog zakona shodno se primjenjuju i na izvršenje mjere pojačanog nadzora u drugoj obitelji.

Odjeljak C. Pojačan nadzor od strane mjerodavnog organa socijalne skrbi**Članak 44.
(Organ izvršenja)**

Odluku općinskog suda, kojom je izrečena mjera pojačanog nadzora od strane mjerodavnog organa socijalne skrbi, izvršava centar za socijalni rad.

**Članak 45.
(Način izvršenja i saradnja)**

(1) Po prijemu izvršne odluke općinskog suda iz članka 44. ovog zakona, centar za socijalni rad dužan je da:

- a) ostvaruje neposredni kontakt s maloljetnikom i njegovom obitelji, putem razgovora, posjeta, obilazaka i na drugi pogodan način,
- b) uspostavi stalnu suradnju sa školom, odnosno pravnom i drugom osobom, gdje maloljetnik živi i radi.

(2) Obrazovne, odgojne, zdravstvene i druge ustanove, kao i udruženja, odnosno društva koja okupljaju djecu i omladinu, dužni su da surađuju sa centrom za socijalni rad i da mu pružaju pomoć u izvršenju mjere iz stavka (1) ovog članka.

**Članak 46.
(Obavještavanje o okolnostima i prilikama koje negativno utiču na izvršenje)**

Roditelji, usvojitelj ili staratelj maloljetnika dužni su da obavještavaju centar za socijalni rad o okolnostima i prilikama koje negativno utiču na uspješno izvršenje mjere pojačanog nadzora od strane mjerodavnog organa socijalne skrbi, kako bi centar za socijalni rad preduzeo odgovarajuće mjere na koje je ovlašten zakonom.

POGLAVLJE III. ODGODA I PREKID IZVRŠENJA ODGOJNIH MJERA**Odjeljak A. Odgoda i prekid mjere upućivanja u disciplinski centar i mjere pojačanog nadzora u drugoj obitelji****Članak 47.
(Odgoda izvršenja)**

(1) Izvršenje odgojnih mjera upućivanja u disciplinski centar i pojačanog nadzora u drugoj obitelji, može se odgoditi na molbu maloljetnika, njegovog roditelja, staratelja ili usvojitelja, bračnog druga ili na prijedlog centra za socijalni rad, u slučaju:

- a) ako je maloljetnik obolio od teže akutne bolesti;
 - b) ako se desio smrtni slučaj ili teška bolest u užoj obitelji maloljetnika;
 - c) ako se maloljetnik nalazi neposredno pred završetkom škole ili polaganja ispita za koji se pripremao, pa bi mu izvršenje odgojne mjere u ovom momentu moglo nepovoljno uticati na izvršenje tih obveza;
 - d) ako trudnoj maloljetnici do porođaja ne preostaje više od pet mjeseci, kao i maloljetnici koja ima dijete mlađe od jedne godine života.
- (2) Izvršenje odgojne mjere u slučaju iz točke a) stavka (1) ovog članka može se odgoditi dok bolest traje, u slučaju iz točke b) stavka (1) ovog članka - najduže za tri mjeseca, u slučaju iz točke c) stavka (1) ovog članka - najduže za šest mjeseci, a u slučaju iz točke d) stavka (1) ovog članka, trudnoj maloljetnici, kao i maloljetnici koja ima dijete mlađe od jedne godine života - do navršene jedne godine života djeteta.

**Članak 48.
(Molba za odgodu izvršenja)**

- (1) Molba za odgodu izvršenja odgojne mjere podnosi se općinskom sudu.
- (2) Molba iz stavka (1) ovog članka podnosi se u roku od tri dana od dana prijema poziva za izvršenje odgojne mjere.
- (3) Ako je razlog za odgodu izvršenja odgojne mjere iz stavka (1) toč. a) i b) članka 47. ovog zakona nastao nakon isteka roka iz stavka (1) ovog članka, molba se može podnijeti do dana kad maloljetnik treba da se javi radi izvršenja odgojne mjere.
- (4) U molbi se moraju navesti razlozi, činjenice i dokazi na kojima se zasniva molba za odgodu izvršenja odgojne mjere.

**Članak 49.
(Odlučivanje o molbi za odgodu izvršenja)**

- (1) O molbi za odgodu izvršenja odgojne mjere odlučuje rješenjem Općinski sud, u roku od tri dana od dana prijema molbe.
- (2) Prije donošenja rješenja iz stavka (1) ovog članka, sudija za maloljetnike može povjeriti centru za socijalni rad da izvrši provjeru činjenica navedenih u molbi.
- (3) Molbu koja nije podnesena u roku iz stavka (2) članka 48. ovog zakona ili koja ne sadrži razloge, dokaze i činjenice za odgodu, sud odbacuje rješenjem.
- (4) Do donošenja rješenja o molbi, odgađa se početak izvršenja odgojne mjere.

Članak 50.**(Pravo žalbe protiv rješenja kojim se odbija odgoda izvršenja)**

- (1) Protiv rješenja kojim se odbija molba za odgodu izvršenja odgojne mjere, podnosilac ima pravo žalbe u roku od tri dana od dana prijema rješenja, Kantonalnom sudu u Zenici (u daljnjem tekstu: Kantonalni sud).
- (2) Kantonalni sud donosi rješenje o žalbi u roku od tri dana od dana prijema žalbe.
- (3) Rješenje iz stavka (2) ovog članka je konačno i dostavlja se, u roku od tri dana, podnosiocu molbe i centru za socijalni rad.

Članak 51.**(Drugi slučajevi odgode izvršenja)**

Općinski sud može donijeti rješenje o odgodi izvršenja odgojne mjere i kada je podignut zahtjev za ponavljanje krivičnog postupka.

Članak 52.**(Prekid izvršenja)**

- (1) Na molbu maloljetnika, njegovog roditelja, usvojitelja, staratelja ili centra za socijalni rad, može se dozvoliti prekid izvršenja odgojne mjere.
- (2) Na prekid izvršenja odgojne mjere shodno se primjenjuju odredbe članaka od 47. do 51. ovog zakona.
- (3) Vrijeme prekida ne uračunava se u vrijeme izvršenja odgojne mjere.

Odjeljak B. Odgoda i prekid zavodske odgojne mjere**Članak 53.****(Odgoda i prekid zavodske odgojne mjere)**

- (1) Odredbe članaka od 47. do 52. ovog zakona shodno se primjenjuju na odgodu i prekid izvršenja zavodske odgojne mjere upućivanja u odgojnu ustanovu, u odgojno-popravni dom ili u drugu ustanovu za osposobljavanje (u daljnjem tekstu: zavodska odgojna mjera).
- (2) Vrijeme prekida ne uračunava se u vrijeme izvršenja zavodske odgojne mjere.

DIO ČETVRTI - IZVRŠENJE PREKRŠAJNIH SANKCIJA**POGLAVLJE I. UKOR, NOVČANA KAZNA I RAD ZA OPĆE DOBRO NA SLOBODI****Odjeljak A. Ukori****Članak 54.****(Organ izvršenja i način izvršenja)**

- (1) Izrečenu sankciju ukor u prekršajnom postupku izvršava prvostepeni sud koji je tu sankciju izrekao tako da se ista posebno evidentira u prvostepenom sudu.
- (2) Prvostepeni sud utvrdit će način vođenja evidencije iz stavka (1) ovog članka.

Odjeljak B. Novčana kazna**Članak 55.****(Način izvršenja novčane kazne kažnjenoj osobi)**

Novčana kazna izrečena kažnjenoj osobi izvršava se na način propisan Zakonom o prekršajima Federacije Bosne i Hercegovine („Službene novine Federacije Bosne i Hercegovine“, broj: 31/06).

Članak 56.**(Troškovi izvršenja novčane kazne)**

Troškove izvršenja novčane kazne snosi kažnjeni.

Odjeljak C. Rad za opće dobro na slobodi**Članak 57.****(Mjesto i način izvršenja rada za opće dobro na slobodi)**

- (1) Rad za opće dobro na slobodi izvršava se u mjestu prebivališta, odnosno boravišta kažnjelog lica na način propisan Pravilnikom o vrsti i uvjetima za izvršenje sankcije rada za opće dobro na slobodi.
- (2) Pravilnik iz stavka (1) ovog članka donosi ministar.

POGLAVLJE II. ZAŠTITNE MJERE**Odjeljak A. Oduzimanje predmeta****Članak 58.****(Organ izvršenja i način izvršenja)**

- (1) Zaštitnu mjeru oduzimanja predmeta izvršava prvostepeni sud, odnosno organ koji je tu zaštitnu mjeru izrekao.
- (2) Prema prirodi predmeta prvostepeni sud, odnosno organ koji je prekršajnim nalogom tu zaštitnu mjeru izrekao odredit će da li će se ti predmeti prodati po propisima izvršnog postupka ili će se uništiti ili ustupiti određenoj osobi.

nom državnom organu ili određenoj pravnoj osobi.

- (3) Sredstva ostvarena prodajom predmeta iz stavka (1) ovog članka pripadaju odgovarajućem proračunu, sukladno zakonu koji uređuje pripadnost javnih prihoda.
- (4) Troškove koji nastanu prinudnim izvršenjem zaštitne mjere iz stavka (1) ovog članka snosi osoba kome je ta mjera izrečena.

Odjeljak B. Zabrana vršenja poziva, djelatnosti ili dužnosti

Članak 59.

(Organ izvršenja i način izvršenja)

Zaštitnu mjeru zabrane vršenja poziva, djelatnosti ili dužnosti izvršava prvostepeni sud, odnosno organ koji je tu zaštitnu mjeru izrekao na način propisan u članku 17. i 18. ovog zakona za izvršenje mjere sigurnosti zabrane vršenja poziva, aktivnosti ili funkcije.

Odjeljak C. Potpuna ili djelimična zabrana upravljanja motornim vozilom

Članak 60.

(Organ izvršenja i način izvršenja)

Zaštitnu mjeru potpune ili djelimične zabrane upravljanja motornim vozilom izvršava prvostepeni sud, odnosno organ koji je tu zaštitnu mjeru izrekao na način propisan u članku 19. ovog zakona za izvršenje mjere sigurnosti zabrane upravljanja motornim vozilom.

Odjeljak D. Vanbolničko liječenje od zavisnosti

Članak 61.

(Organ izvršenja i način izvršenja)

- (1) Zaštitna mjera vanbolničko liječenje od zavisnosti izvršava se u ovlaštenoj ustanovi koju odredi prvostepeni sud, na način koji odredi prvostepeni sud.
- (2) Troškove obveznog liječenja, za osobe koje nije zdravstveno osigurano, kao i dio troškova koje, po posebnim propisima, snosi sam osiguranik, za kažnjenu osobu koja ima prebivalište na području Kantona, snosi Kanton.

Odjeljak E. Druge zaštitne mjere propisane posebnim zakonom

Članak 62.

(Način i uvjeti izvršenja)

Druge zaštitne mjere propisane posebnim zakonom izvršavaju se na način i pod uvjetima utvrđenim tim zakonom i zakonom kojim su regulisani prekršaji u Federaciji Bosne

i Hercegovine.

DIO PETI - IZVJEŠTAVANJE O IZVRŠENJU SANKCIJA

Članak 63.

(Podnošenje izvještaja)

- (1) Organi iz članka 3. ovog zakona, dužni su podnositi izvještaj Skupštini Kantona o izvršenju sankcija iz članka 1. ovog zakona, najmanje jedanput godišnje.
- (2) Organi iz stavka (1) ovog članka dužni su, po zahtjevu Skupštine Kantona ili Ministarstva, podnositi izvještaje o izvršenju sankcija i za kraći period ili samo za određenu vrstu sankcija.

Članak 64.

(Metodologija podnošenja izvješća)

Izvješće o izvršenju sankcija iz članka 63. ovog zakona podnosi se putem Ministarstva, po metodologiji koju, pravilnikom, utvrđuje ministar.

DIO ŠESTI - PRIJELAZNE I ZAVRŠNE ODREDBE

Članak 65.

(Izvršavanje pravosnažnih odluka inostranih sudova i sankcija izrečenih stranim državljanima i osobama bez državljanstva)

- (1) Po odredbama ovog zakona izvršavaju se i pravosnažne odluke inostranih sudova, ukoliko posebnim zakonom Bosne i Hercegovine ili međunarodnim ugovorom nije drukčije određeno.
- (2) Po odredbama ovog zakona izvršavaju se i sankcije izrečene stranim državljanima i osobama bez državljanstva, ukoliko posebnim zakonom Bosne i Hercegovine ili međunarodnim ugovorom nije drukčije određeno.

Članak 66.

(Rok za donošenje pravilnika)

Pravilnik iz članka 16., 57. i 64. ovog zakona, donijet će ministar u roku od 90 dana od dana stupanja na snagu ovog zakona.

Članak 67.

(Ravnopravnost spolova)

Gramatička terminologija korišćenja muškog ili ženskog roda u ovom zakonu podrazumijeva uključivanje oba roda.

Članak 68.
(Prestanak važenja Zakona)

Stupanjem na snagu ovog zakona prestaje da važi Zakon o izvršenju sankcija u Zeničko-dobojskom kantonu („Službene novine Zeničko-dobojskog kantona“, broj:16/00, 6/01 i 15/03).

Članak 69.
(Stupanje na snagu Zakona)

Ovaj zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-8662/09

PREDSJEDATELJ

Datum, 01.04.2009. godine

Zenica

Sejad Zaimović, v.r.

79.

Na temelju članka 37. stavak 1. točka f. Ustava Zeničko-dobojskog kantona, Skupština Zeničko-dobojskog kantona, na 28. sjednici, održanoj 31.03.2009. godine, donosi:

ZAKON
O VISOKOM OBRAZOVANJU

DIO PRVI - UVODNE ODREDBE

Članak 1.
(Predmet zakona)

Ovim zakonom uređuju se sistem, uvjeti i način obavljanja djelatnosti visokog obrazovanja, financiranje, kao i druga pitanja od značaja za obavljanje ove djelatnosti na području Zeničko-dobojskog kantona (u daljem tekstu: Kanton).

Članak 2.
(Djelatnost visokog obrazovanja)

Djelatnost visokog obrazovanja je od posebnog društvenog interesa za Kanton i dio je međunarodnog, a posebno evropskog obrazovnog, naučnog, odnosno umjetničkog prostora.

POGLAVLJE I. CILJEVI I PRINCIPI VISOKOG OBRAZOVANJA

Odjeljak A. Temeljni ciljevi i principi

Članak 3.
(Temeljni ciljevi visokog obrazovanja)

Temeljni ciljevi visokog obrazovanja su:

- a) ustanovljavati, razvijati, štiti i prenositi znanje i sposobnosti putem nastave i naučnoistraživačkog rada, i time doprinosti razvoju sposobnosti pojedinca i društva;
- b) pružiti mogućnost građanima da, sukladno propisima, pod jednakim uvjetima uživaju korist visokog obrazovanja cijeli život;
- c) razvoj znanosti i unapređivanje umjetničkog stvaralaštva.

Članak 4.
(Strategija programa razvoja)

- (1) Razvoj djelatnosti visokog obrazovanja na području Kantona utvrđuje se Strategijom razvoja visokog obrazovanja, koju donosi Skupština Zeničko-dobojskog kantona (u daljem tekstu: Skupština Kantona), na prijedlog Vlade Zeničko-dobojskog kantona (u daljem tekstu: Vlada Kantona).
- (2) Strategijom razvoja visokog obrazovanja utvrđuju se strateški interesi i potrebe Kantona u oblasti visokog obrazovanja, mjere za obezbjeđenje razvoja i unapređenja kvaliteta visokog obrazovanja, financiranje, kao i druga pitanja od značaja za razvoj visokoškolske djelatnosti na području Kantona.

Članak 5.
(Principi visokog obrazovanja)

Djelatnost visokog obrazovanja se temelji na sljedećim principima:

- a) akademskim slobodama, akademskoj samoupravi i autonomiji visokoškolske ustanove;
- b) jedinstvu nastave i znanstvenoistraživačkog, odnosno umjetničkog rada;
- c) otvorenosti visokoškolske ustanove prema javnosti, građanima i lokalnoj zajednici;
- d) uvažavanju evropskih humanističkih i demokratskih vrijednosti, te usklađivanju s evropskim sustavom visokog obrazovanja;
- e) poštivanju ljudskih prava i građanskih sloboda, uključujući zabranu svih oblika diskriminacije;
- f) interakciji sa društvenom zajednicom i obvezi visokoškolske ustanove da razvija društvenu odgovornost studenata i drugih članova akademske zajednice;
- g) učešću studenata u upravljanju i odlučivanju, posebno u vezi sa pitanjima koja su od značaja za kvalitet nastave;
- h) ravnopravnosti visokoškolskih ustanova bez obzira na oblik vlasništva, odnosno na to ko je osnivač;
- i) afirmaciji konkurencije obrazovnih i istraživačkih usluga radi povećanja kvaliteta i efikasnosti visokoškolskog sistema;